



ル 4  
3106





儿 4  
3106

門 儿 4  
號 3106  
志

新定圖書  
故菊地三  
九郎氏  
一  
月  
三  
年

相豆紀行序  
相豆之地。北背山面海。其境絕  
奇。且溫泉所在有之。以故四方  
扶病之徒。命駕而行。果衣糧而  
走。及好事者。莫不出王遊衍焉。  
然率皆俗狀塵腸。徒與俳優

序

圖書

362



侏儒。操雜乎其間。否則從禽  
矢魚。以供身目之娛。不顧腥其  
林。臊其山。靈若有知。則其不  
疾首感頰。訟其不幸乎哉。蓋  
以浴沂之思。出乎曾點。濯足之  
歌。發乎孺子。寒裳之遊。其來

舊矣。吁。其得采真之趣者有  
幾。友人菊池叔成。宏才竒思。風  
流名士。嘗遊相豆之地。記其跋  
涉所經。江山之竒。泉石之勝。及  
劇談笑語。于晨于夕。莫不具錄  
細述焉。運筆之妙。波瀾翻起。



使觀者應接不暇。果是境之  
奇耶。抑亦文之奇也。或云。非  
斯文無以奇彼境。而非彼境無  
以奇斯文矣。余曰。唯之否之。夫  
相豆之山。慕尔培塿耳。設使  
孙茂登龍門。探禹穴字。其展


才騁技。豈心於此哉。惜哉。大才  
小用也。然則孙成得彼境。未  
足以盡其伎倆。而彼境待叔  
茂。然後錦其林。繡其山。意  
者。夫山靈不破顏。伸眉喜其  
值遇乎哉。



南紀 金谷英識



汶山領芝巖書



相豆紀行

南紀 菊池禎叔成著

男 元習 世章 錄

辛丑春三月飲于山士訓清風館酒酣興熟士訓舉觴屬余曰久矣吾輩夢寐山水而身在羈絆紛冗害事未嘗能一酬夙志也今茲將告暇而遊相豆之間弔古跡探奇絕溫泉以洗塵垢之顏丘壑以鑿烟霞之疾若得與子偕之則幸莫大焉余曰諾願附驥尾



相豆行  
敢請卜期乃相約而去爾後士訓以書愆通者數越  
六月旅裝已具官亦賜告遂以廿三日發拜別阿母  
於北堂昧旦出門島士彰田仲嘉田世賞從弟士有  
兒習也從而送行自青山步歷龍土街麻布邑赤羽  
橋抵三田坊憩于茶店士訓尋至相視欣然田子耕  
野美卿紀奉仲亦至焉雨初初衝泥行得品川驛驛  
樓鱗次往來絡繹數百步得鮫洲村忽見岡公修山  
道甫蘇百順提挈入肆設祖張宴十有餘人懽然獻  
壽唱渭城歌驪駒言笑晏晏各以詩壯吾二人行色

矣日已下已割慶而行獨田仲嘉戀戀不去聯步行  
談過鈴叢大森度六合河雨色漸霽河水湯湯得河  
崎驛謝仲嘉而別余士訓及家僮伙三人一行喜喜  
首途經鶴見生麥諸村得金川驛列肆臨涯頗可眺  
望房嶠總山亘帶若畫出驛路下暑甚少憊乃命肩  
輿踰權大阪餼飽阪左右緣溪長松落落蒼翠欲滴  
二人並輿吟哦相和興趣甚矣宿戶冢驛廿四日蚤  
發路或土或下左顧則相海瀲灩姚島繪島出沒波  
間右眄則雨降玉筍足柯諸峰黛色聳雲行十餘里



歷藤澤度馬入河得雞足山夏木葱蒨幽邃可愛又  
得唐土原寒蟬噪林野花艷目乃國風所詠也歷大  
磯驛餘綾浦南湖村揭酒勾河抵小田原廿五日早  
發少進左折入閭巷仰瞻函嶺崖巒吐納雲霧吞若  
彼雞足者十百矣得駛川水自函嶺下清冷可掬計  
可二百武而不建橋或架木或聚石若蕪箬為砥礪  
則褰裳而涉已涉路稍躋右山而左海時旭日始升  
滄滄涼涼晃彩射波小田原城隱見翠微粉堞的的  
如蜃樓海市又數里灌木夾路地險多石大有奇狀

始見其尋者則士訓稱奇不止又見丈者則余亦稱  
律不置既而數尋者數丈者倍蓰者十百者突然當  
路嗽然臨涯隕墜轉圻偃蹇卧波或如屋如堂或如  
虬席如蟠螭或如龍出背鯨軒鬣或如走猪衝浪渴  
驥飲溪往往不可枚舉也士訓喏焉自失曰是盡大  
地皆石而巨靈聚砂雨之迺為山為阜已亦未足異  
也余笑其誕謔得石橋山乃源幕府伏匿于樹竅中  
而避厄之慶又真田股野夜戰之跡在焉過米噲村  
得根府河奔流沕沕巨石為梁有關隸函根而塞間



道也出關數里踰赤澤山土人采石為業椎鑿硃硃響傳林壑地益嶮峭暑亦大甚屢挹溪泉解渴又數里路稍遷逶迤下海岬得葦濱杉樹山鷓鶴崎皆不遠云就漁家飯擊鮮頗美飯訖而出鹵鳥低昂拾步殊艱有野水曰門河踏石而涉是為相豆分界得土肥山上出雲表循山腰而行驟雨暴至乍陰乍晴無有人家蹊徑殆絕約二十里得日阪臺斗折而下漸見田疇見村落又登又降乃始至熱海熱海一聚落背山面海民屋櫛比輒投逆旅而宿廿六日晏起入

浴室室設大小二槽其大槽泉脈通焉熱不可觸乃注諸小槽待其氣稍減而浴絕無硫臭唯有鹽氣味苦鹹也浴罷啼髮坐望階前之阜有孤亭榜曰一色余與士訓把酒而上倚軒騁目眷而西顧嶂巖岡巒壯聳列峙雲蒸霞蔚東南望則島嶼萍浮風帆鷺翔海色瀟灑與天無際士訓莞爾曰善哉此遊也非我斷則不遂非子助則不奇且夫峨嵋乎高者洋洋兮深者爭獻笑呈奇矣我亦特奇其奇可不以奇我文乎哉余曰吁文則姑舍之夫都下公侯貴人富商大



賈亦能遊遊則必有樂焉不畋則漁不荒則亾或于  
田陵藪菴無居人蹄兔射雉或修網連紘舠艇  
拚海奴戮波臣而備觀或朋淫流連以汚雲壑絃歌  
絲竹以濫清音壯則壯矣樂則樂矣由我觀之皆誣  
誣然如將不得已者孰與吾輩玄對勝境吟賞忘倦  
走心於白雲來翰於滄海一觴一詠惟日不足者願  
問諸山海之靈焉相笑更酌盡醉而止薄暮逆旅主  
人來謁主人渡邊氏頗善談論試問山水之勝主人  
曰我豆州徧小濱海攝乎駿相之交東西二日程南

北陪之斲長補短則四五日程而咸窮於海也大島  
者舟行百里初島十里而近八丈島千里而尚遙三  
島共隸于我州其山水近而可遊者有金峰圓岳迸  
湯之山又有錦岳洞觀音窟皆可三餐而反若夫北  
條伊東之墟天城加貫之勝雖裹數日糧未可以極  
而已又叩以溫泉之事主人曰相傳天平勝寶中少  
彥名神降憑童而言于有神瀆在海之濱其浴之者  
廢無疾疢至養老年有釋萬卷者憫其熱流入海水  
族多死而禱祀之泉為之退里餘竟移今慶爾後王



侯士庶爭來漏浴膏肓或痊沈痾忽除於是逆旅家  
作陰規於地中引之以候遊客之利其辯可聞事則  
未足徵矣廿七日方遊迸湯山謁豆嶽廟土人張生  
及僮僕從焉土人寔為嚮道也右海而行二里路岐  
為兩一下一上建石為標張生曰由右則先迸湯後  
嶽廟由左則先嶽廟後迸湯余乃左上阪路崎嶇泉  
石皆美三里許得廟門積翠岑鬱宮堦似如相傳  
帝仁德時祀忍穗耳神廟製古樸而荒蕪梁桷彫剥  
丹青黝昧又揭松葉木生金地三仙圖三人共不知

何姓氏遊於民間僅百年後丹成而昇仙于此云有  
社樹大合抱直幹刺雲土俗呼稱那樹那樹方言或  
云竹栢未審  
余顧士訓曰噫吾何當遺世避穀從松葉而游尤挹  
木生袖右拍金地肩逍遙乎茲丹丘不死之福庭也  
士訓哂之余又欲探國風所詠古井叢者張生曰莫  
有勝景唯一樹林耳遂止得石磴下里餘抵海圻有  
湯泉自崖迸出宛如決雷也茅簷數椽皆侵涯乃入  
呼酒憑檻而眺望一瞬萬里森無端倪天網橫裂洪  
濤人立決漭潄潄若乎陽乎出有人無乍藍乍雪隈



淫泐嘖跳波鬣旋為渦碎為電為卷席為奔馬為  
連山非雷非霆隱隱欲當此時木子欲廢其賦故  
叟何遑其發乎士訓稱快哉急取巨羅酌以敵之口  
號一詩余和之臨風歌之日色翳翳影浴虞淵僅仗  
適隨漁人得石决明數枚剖為下物冷如嚼冰齒頰  
生寒張生屢促歸遂取道山下穿曲徑涉幽溪茗歇  
九節徃徃叢生于石間乃知竒卉靈藥庶乎可得焉  
數里抵石標由舊路而還廿八日夜將明忽夢亡友  
平君叙君叙歿三年于今歲月荏苒音容髣髴憶昔

日金蘭之誼淚漣而下輒作文祭之與士訓話舊鬱  
陶不樂乃將出遊寫憂阻雨不果廿九日天晴暑甚  
翰墨銷日晦日食時杖藜而出出門右折數百武至  
泉源處有巖穴疊石為渠方十餘丈繚以竹欄會其  
洶沸勢若建瓴殷殷雷鳴蒸烟升天噴沫霰霖久望  
之則衣為濡矣土人云其涌有期刻晝夜凡六次鳴  
呼造化之祕不可測如此也夫傍有叢祠祀少彥神  
背祠行百步踉蹌而下呀然入空谷中小口大腹形  
如胡蘆又立小祠祀木宮神有三樟樹蟠屈擁腫中



皆朽虛容十數人其大可知也多怪樹多奇石薜荔  
蔓蔓白日無影實山鬼木魅之窟哉辭而出轉蹊田  
間畦流淙淙有水碓水磨薄晚還舍七月朔謀買舟  
探海上之奇命伙齋酒及釣具抵念佛山下午後上  
舟南嚮解纜滄溟渤蕩無風而波削壁千仞吸峨奪  
目怪巖詭石怒起爭立曰天女曰碁局曰烏帽曰兜  
鑿曰門曰霰皆以其狀命之也惟天女者就其巖巔  
嵌為妙音祠碁局者在懸崖欲墮不墮舟人云其面  
有夾道蓋仙跡也須臾舟轉西得錦蟲洞穹窿百尺

不大深彷彿有光石髓垂乳苔蘚為文一奇觀也舟  
又少徙得觀音窟形如斧劈黯昧不測從丈餘衡僅  
可束身而入也舟人乃將揭炬而導時汐流正漲濤  
與巖爭雄一進一退勢欲互碎舟竟不得進士訓意  
愈益壯余則愴怛自廢舟人云是亦仙迹也窟其始  
甚窄既入稍寬數十步小溪橫流度溪而若干步又  
大寬有觀自在石像過此以往亂石崢嶸昔有人欲  
窮之者三日而后出猶未能得造其奧云言率無誓  
頗類靈威丈人探洞庭之事遂命迴棹士訓開甕而



杳杳行  
酌余俯舷下瞰瑩澈朗朗蚌珠可拾魚蝦可數如燃  
犀而窺龍王藏也於是舟人篙師繼綸投餌乃投乃  
得不翅探囊底物余與士訓鼓柁擊節作滄浪歌更  
浮大白轟飲傾海黃昏就陸而還二日僧昭曉者來  
通謁自云武金川人輿疾客遊于此與士訓圍棋棋  
品下於士訓一等又與余清言剖析玄理了然入微  
三日雨四日昭曉又來告別且乞詩賦與之至晚陰  
雨噎噎至六日閉戶不出唯有溫泉滌暑濁醪解渴  
數浴數酌被髮散帶悠悠彌日不知復有世上也七

日夕雨始晴緒風滅熱迺提挈上一色亭纖月照簾  
銀河瀉海相與朗吟謝惠連牛女詠則林壑鏘錚浮  
雲不流鄉思索莫以酒澆之夜半就寢八日早起盥  
漱溫泉宿醒頓解余束裝而出士訓追及之西行數  
百步過委巷際畦路曲曲瘠田嶢峩間見巨石布置  
如柱礎者問之野人云慶長九年神祖嘗駐駕于  
此寬永十六年猷廟亦有御遊之命而不果是其  
行殿遺趾也有浚流自西北下來右山麓入于海其  
一曰初河二曰絲河三曰和田河相去皆不能百餘



步民並橋焉又少進遙聞梵唄木魚響風乃攀翠屏  
而上仄徑數轉得興禪寺堂宇蕭散爽塏可愛有僧  
為語曰在青藤黃門藤房仕建武朝直諫忤旨自劾  
而去雲遊晦迹後來嘉遁于此影不出山數年實我  
法祖授翁師也階前喬松其所手植雖無徵於史傳  
理或當然已有古鐘銘鏽蝕試搨數字讀之寬永十  
年所鑄也循覽忘疲徘徊久之會報鄉信到乃急還  
旅舍得阿母家人書及岡公脩田子耜井伯秀島士  
彰野美卿紀葦仲古子文兒習也詩九日嘗聞井氏

一碧樓之勝而未及探也此日因張生為紹介至則  
日已夕飛構百尺海氣入窻萬頃縹碧斜陽明滅坐  
而望之若摘朱霞散乎瑪瑙盤然而其勝猶不能當  
一色之半也辭還夜與士訓計歸以詰旦為期十日  
五鼓蓐食主人及張生送別傭一村夫為嚮道質明  
上途北行數百步迢遞而躋榛莽塞路朝露濡裳上  
三四里曰土澤之山有古佛堂竒樹繞焉列泉懸焉  
藉草而憩時日昇已三竿東溟渾渾和光弄晴大黑  
小黑天城加貫箭括諸峰秀色媚人俄有雄虹一條



木豆行  
綉談起於前溪流霞注射彩翠可摘更上五里曰日  
金之峰又有古佛堂異卉華美石峙佳木茂漸似非  
人間境又穿堂後徑箇籬撲面猿貫而登里許飄飄  
乎如羽化而憑虛稍覺少坦乃圓岳絕頂也天颺颺  
至秋雲四起蒼兮蔚兮郁郁紛紛滿襟入袂如為綿  
絮所包咫尺之外毫釐不能睹也余乃倣韓昌黎衡  
嶽故事而作歌歌曰鬱圓岳兮言上巔躡白雲兮負  
青天恍縹緲兮暫踟躕尚遐舉兮接列仙曲未闕澗  
壑噴谷虛牝相應余懽然悲喟然歎曰嗟乎吾輩未

換凡骨肉眼而猥叩天閭窺玄聖之窟宅焉宜乎山  
霧妬吾遊屏翳闔其祕矣傭夫曰凡相豆駿遠山岳  
苟稱喬陟者盡鍾秀於此間而茲岳獨擅其賞坐致  
諸衽席下焉芙蓉雖孤高道鹿若其壯觀或不多讓  
云士訓聞之益如有所喪也得一美石欲題名雲氣  
淋漓不受墨隨拭隨濡數點而書下還日金就別途  
而降里餘又越一嶺真霧始霽下頰田代三島小瀨  
長濱沼津葦原等諸邑樹若箸河若練池若鏡林若  
齊人若蟻舟若芥遠近參差歷歷可辨又經鶴牧丹



木豆行  
十一  
奈駟車皆鎌倉氏古跡且其乘馬磨墨生啞所產之  
處云抵輕澤村而息傭夫辭還又度山陞數里仰瞻  
青霄見如覆盆者同行共矚目須臾靄散則富嶽突  
出玉削萬仞恍現全身巍巍乎亭亭乎胡然而帝也  
使人不覺肅然歛襟矣足柯足高寶永蠹蠹爭秀如  
兒孫媚王父也數里下夷途歷大桶平井大場等里  
落得三島驛謁三島神峻宇彫牆頗壯麗池魚數百  
頭澆滯唵喁余意甚樂之有濠濮間想欲就宿焉顧  
畧尚高乃飲酒壚引土人諮前程云函嶺距此三十

餘里士訓猶豫余方醉振策而發踰柄原法華大小  
眾諸阪得山中村又欲宿余自奮而登回眸豆海波  
浪浸天孤島汨沒詠鎌倉右府國風之什吟眺久之  
士訓瘴暑渴甚曰當此峻嶮而無人置義漿者豈以  
吾輩為辭嗟來者邪一笑而行率下百步則止二百  
步一上一下罷憊殆極最後下三百餘步乃得函嶺  
驛桑榆無景望舒代之忽見一帶白於前林間漸迫  
則所謂蘆湖也冰輪濯影淪漪不起玲瓏若玻璃鏡  
士訓拈掌歎造物之巧余則解道樹裏南湖一片明



白宿于郵亭夜寒如冬旅服單衫擁爐而卧十一日  
味爽發百武許得函關度關里所循湖而行嵐氣澄  
渟衆山倒影霏塵可拾得一霸鎖乃玉函宮也宮大  
率伯仲乎豆嶽廟而粉飾稍新巡覽而出山雨滂沱  
沾濕而步路蹉蹶甚屈曲千盤比諸疇昔關西之險  
猶什倍焉鈿口猿跡阜角諸阪皆以險目也下抵蟠  
陀驛忽唐突故人立子玉子玉別號東蒙江都賈人  
方今之豆天城山相視懽甚迺共謀塔澤之遊推子  
玉為東道攜手而下踰川端村度巢雲橋左折入徑

仄仄數轉或涉絕澗或攀林薄如穿洞行者數里得  
一溪流野橋百尋度則為塔澤阡陌交通雞犬相聞  
宛然一幅桃源圖也主福住氏家層樓枕溪曰含翠  
傍作石階其下為涵室有槽坻石為底泉溫而甘自  
石間流出潺湲可愛不知驪山之靈液鍾山之丹溜  
與此果如何耳三人共浴浴罷呼酒境之與人得焉  
閑之與興適焉同醉同臥夢亦同趣十二日列風迅  
雨前溪暴漲園流十仞壞岍轉石滔滔襄陵老弱號  
呼上草而避之壯者奔走營救擾喧至有溺沒者薄



暮雨歇水亦少却蓋塔澤水發源蘆湖而與諸溪澗  
合至駛川入于海故湖溢則乍溢以尾閘不遠其泄  
亦速二鼓還樓相聚慶身不葬乎魚腹十三日新晴  
余獨著屐而出躡石徑上得一禪刹曰淨福院草閣  
臨溪寂無塵雜壁間有記曰昔人建阿育王塔於此  
因以為地名詰之山僧竟不得其審也塔峰在溪西  
橋斷不可跡也還則士訓子玉欲探山中諸竒乃由  
山脊上攀援而升者里所並巨壑而踰連岡石泓成  
韻雲樹落蔭蔥蔥者目送之琮琤者耳迎之左應右

接俯聽仰瞻不暇盡名狀之抵大平臺山稍稍迂而  
澗里餘又得一巨壑下則為堂洲溫泉泚涌云是夢  
想國師棲隱之地坐禪石猶存焉有水簾懸于崖隙  
頗壯觀也得曲蹊上出西北行者數里抵宮下村止  
宿又有溫泉不知自何處出竹竿裊裊而來注焉十  
四日盱發百步許得底倉村溫泉感沸自危岬噴他  
山竒者更上數里揭蛇骨河溪流也又數里路益躋  
多土山少樹石竟極鳥道而至最高頂班荆息焉北  
顧嫗岳駟岳皆若螳垤土壤獨孿峰峙于西纔可仰



止東南則巨浸汪洸不辨遐邇唯見正東滄濛之間  
酒勺河搖匹練而已得一村落忽覺硫黃息衝鼻乃  
所謂蘆湯者也探之則一室而三湯冷且臭不可掬  
也子玉曰凡山中諸湯率巖礮所蒸故臭味亦相似  
唯堂洲之湯少有三山鹽氣其療疾治傷各自有宜忌  
而若其清麗晶瑩則莫及塔澤之泉者也得峻阪就  
下漸下漸險且隘而急左肩摩崖右趾臨壑劍鞘時  
時鱗石足為之躓里許得瀑布懸于壑北青壁直下  
萬尺亂激珠散中間為崖樹所遮隱而復見竒壯不

可言也里餘路稍夷藤竹為林林盡而圃圃窮而徑  
由民家間而得驛嚮邂逅子玉慶也投舍止宿室陋  
惡甚三人談文論心申旦不寢十五日早發子玉分  
手出關東西一別為悵然久之遂下里所道左得一  
巨石縱橫丈餘方面如剉余與士訓竊相謂曰若鑄  
在德不在險五大字則山中一壯觀也又下里餘會  
崖路崩行旅不通民造梁於溪而未成徘徊不得度  
也復還驛擇舍而宿十六日信宿十七日山雲草莽  
微雨隨之廓落羈旅無聊甚矣十八日晡後報徒扛



既成乃趨裝而出二里餘下溪小石平布有急瀨架木為杠行蒹葭間者數十步又上陸得湯源村是日後溪始通前路猶遼過客皆麋聚于此無館可投輒詣一蘭若請宿寺號正眼據阜於道南飽雲南屏雙朶諸山斷續當軒法雲樹雨林樹蓊鬱少選月自東方之峰上清猿哀嘯爽籟破夢不覺蓮漏報曉籌十九日盱出下山里餘得早雲寺北條氏五世碑在焉推墓門而入吊之頽壑委草狐兔穴墻余泫然語士訓曰吾嘗讀國史應仁文明之間足利氏失其鹿天

下蹠血英雄爭起犄之角之紛相蹂躪矣早雲者勢人勇且智計以文化率下風靡數州終據玉函之固相海為池子孫相承九十餘年及天正之役堡障未改帶礪依然豐公一叱而三軍瓦解雖有墳塋不能復血食孟子所謂五世而斬者也東望石垣之山陰雲靄霽使人神氣勃興而豐氏之裔亦安在哉于嗟是乎非乎孰笑齊景牛山之涕邪士訓慨焉不答又二里許得峽流岨橋墮水勢如箭鼉鼉魚鱉不能道焉村夫作素木輿駕以度之十夫舁一輿吁嗚打



木豆錄行  
號相扶而涉猶尚恐顛沛既而土岬歷一二村落行隴畝間禾黍盡偃林木斯拔土人言前十二日風雨暴至河伯為厲也同行皆吐舌幸不遇彼之怒矣又經山村一二抵小田原酒勺河亦溢濫未可以渡乃止宿二十日謀遊長興山飯已而出寓目驛中街衢交達四民既庶仰視城堞則崇墉百雉樓櫓標于山冢西行數里得石壇於道左乃為長興山拾級而登松杉蔽日空翠深襟里許至巔得大雄寺鐵牛禪師所創云碧甍造雲利幡颭風樓門華殿壯嚴可觀有

驅烏僧引吾輩至于後園海也岳也峰巒也諸奇百出如入畫圖中下界蒼茫落日浴波斜暉滉漾為紋為縠松籟濤起山泉玉振實清涼無熱之境也其勝可賞者數焉曰透天橋曰卓錫泉曰放生池曰白雲關曰一吸亭令吾遊覽忘歸二十一日紀人山子謙通刺來訪蓋子謙祇役東都會以秋水故淹留在于此云二十二日行見子謙于客舍詩酒相命酣暢移晷夜雨旅况蕭索展轉至曉二十三日蚤發出郭郭歷田野二里許抵酒勺村而臨河一望瀾瀾兩埃之



木豆紀行 十七  
間防堤十里下流注于海與潮鬪激耻洋不辨牛馬  
余曰水哉水哉是不曩昔所揭者乎所謂昨日淵兮  
今日湍也乃與士訓歌飛鳥河之章就輿而濟既濟  
經大磯平冢等驛抵藤澤驛世所稱湘中諸勝距此  
不遠也初出都與士訓約是行也必賦黍離於鎌倉  
舊都探驪珠於繪島龍窟傍遊金澤而裁八詠官暇  
有限恐其愆期終不能以果也士訓感額惜之余曰  
古人有得隴望蜀之語今也則反之既度相豆海岳  
其幽麗竒處無境不到到則無不究之庶幾生平夙

志或可少償哉湘中小矣豈足言乎遂相笑而步窮  
日之力宿程谷驛二十四日星言夙駕馳數十里至  
品川驛與士訓揖別各由捷徑晡時至家走府謁官  
長還而宴於北堂春鞦韆聊奉菽水歡焉暇日搜  
遊囊繕次夙稿記其壯遊偉觀可記者他文若干詩  
五十餘首別錄

衡岳子曰吾少長東都為人於邸中足未履名山目  
未睹川澤每讀昔人遊記紀行未嘗不超然欽羨其  
壯觀而疑其文飾過實自有此遊始知宇宙之大造



化之巧何物不有也於是乎操觚徒恨吾喙短而已  
若夫覈論民庶風土分率山川夷險吾則不暇云

河島綱明

東都

古山政禮同校

釋順雅

相豆紀行終

附錄

祭平君叙文 并序

平彝倫字君叙東都人家世業鑿仕紀上大  
夫某氏性敏好學事觀海松崎先生洽聞強  
記無所不窺曾與岡公修田子耜及余為四  
友之交君叙耿介簡貴不容於世數跌踢宦  
途竟退而隱于市安永八年己亥六月十三  
日未壯而病歿今年辛丑之夏余適告暇遊  
相豆之際一夕夢君叙於逆旅晤言惇惇雅

附錄

思玄亭藏



如昔日覺而屈指則實過其大祥辰矣不堪  
悲惋涕淚交頤輒以山羞野酌祭之客館焉

其辭曰

維天明改元辛丑夏六月壬申朔己亥友人南紀菊  
池某謹告故處士君叙平先生靈曰嗚呼君叙昔共  
妙年結社牛門齒固與田左挈右提膠漆自堅并轡  
藝苑顧謂我儂載脂載牽孰課後先搗藻摭華思風  
言泉譬諸葑菲若蕙若荃嗚呼君叙誼非一日攸攝  
友于情好亦密嘗共事師才氣超逸懷瑾握瑜升堂

入室深藏如虛內文外質惟學遜志子勉吾佚耽思  
訓詁經解滿帙子性冲素宦途屢躓遇世不周親交  
中失嗚呼君叙人之坎壈青蠅具錦胡然貪婪衆口  
嗷嗷虎視眈眈蘭摧蕭蔓臧否難談言脫羈絆卸冠  
抽簪被褐懷玉其罪竟覃曾節史直固無所慙卜居  
陋巷始去蕪穢環堵漏濕倏然自愛于嗟哀哉天無  
知乎疾忽為痾命有數乎哭而吞悔芝茱靡驗丹竈  
永廢幽明道阻隔絕磬欵地下修文真職安在去者  
日疏寒暑再代嗚呼君叙夙志未酬大命已終奄託



玄丘來入吾夢其何所求言笑如昔晤語未休山雲  
變黓海風颺颺魂兮不止淚兮不收殘燈焰黯曙禽  
啾啾寤言追惟于過大祥設奠旅次仰告彼蒼感念  
有餘文不成章敬乏蘭藉醑少桂漿雖薦不美顧聞  
馨香嗚嘯哀哉尚饗

衡岳先生客中諸作有相豆概覽序山氏硯銘及  
書牘若干首皆別錄特以此編者紀行中所關係  
請而附焉觀者莫為贅疣云河島網明識

附錄終

刊海岳雜詠相豆紀行後序

家君性恬澹慕隱操雖薄宦容跡弗貪榮貴弗求聞  
達。休暇則明酒相命證嚮古今著述以自娛。而其必  
為同盟知音之外不復示諸人。故人亦無知其學之  
所至。與技之所長者矣。元習幼受學家君。唯是下愚  
為性。深忝庭訓。謂之何。雖然既已生為人之子。寧不  
思成人之業乎。近時輯錄家君文。漸積滿帙。而舊在  
無副稿者。皆散逸無遺。索之諸友家。幸得其十二三。  
將鐫藏于家塾。乃先取海岳雜詠相豆紀行二編。請



之家君。家君笑曰。人之情乎。人之情乎。家有敝帚。享之千金。信哉。豈以是瑣。蕪辭。貽笑大方乎。習退而謀二三社友及弟慶甫。遂再請刊行。此二編者。昔年家君輿疾遊相豆。諸勝之所作。雅尚風致。或可。以見其一丘一壑之旨。亦是一時漫筆。固不足軒輊家君矣。世之君子。若欲觀采而賜品評。姑。僕全集。鑿成而可也。寬政辛亥八月

菊池元習謹識

古山政禮書



南紀菊池內記著

演聯珠詞 近刻

寬政三年辛亥刻

東都書肆 鴨伊兵衛梓



